

Oqaasiliortut ataatsimiinnerat

Marlunngorneq, decembarip 11-anni 2012, nal. 13.00
Oqaasileriffimmi.

Peqataasut: *Carl Chr. Olsen, Stephen Heilmann, Eva M. Thomassen, Lotte Holm aamma Katti Frederiksen.*

Allatsi: *Katti Frederiksen*

Oqaluuserisassatut siunnersuutit:

1. Tikilluaqqusineq aamma ilisimatitsissutit (OQAASERSIUUT) Siulittaasoq tikilluaqqusivoq ilisimatitsillunilu ukioq manna Oqaasiliortuni ataatsimiinnerit kingullerimmassuk.

OQAASERSIUUT saqqummerpoq, naqqiissutinik ilassutinillu ilaqarluni, taamaattoq naqqiissutissat suli, ass.kalveknæ (qooriakitsoq) allallu aaqinneqanngitsut elektroniskertaani aaqinneqarumaartut nalunaarutigineqarpoq.

CCO novembarip naanerani Danmarkimi Netværksmødemi Ekspert Gruppen Sprogrådimilu isumasioqatigiinnermut peqataasimanini eqqartullatsiarpa, ilaatigut ukioq nutaamiit Avannaamioqatigiinni oqaatsit eqqarsaatigalugit suliniaqqinnissami oqaatsinik allanik paasinnissinnaaneq (sporgforståelse) qulequtaritinneqassasoq aalajangiunneqarsimasoq ilisimatitsissutigalugu.

KVUG (Kommissionen for Videnskabelige Undersøgelser i Grønland) ukiut 135-it atareerluni ukioq nutaamiit atorunnaarsinneqarluni Forskningsråd i Grønlandimik pilersitsiniartoqarnissaa pillugu tallimannngornikkut ataatsimiinnermi CCO peqataassalluni nalunaarpoq. Oqaatigaa ilimagalugu nutserisunngorniarfik netværkiliornissamik piunasaqassasoq, tamanna pisariaqartoq ilisimagaluarlugu taamaattoq aamma Oqaasileriffimmiit taaguutinut tunngasut, kiisalu inatsisiliat pingaarutillit akuerineqannginnerini kalaallisut oqaatsinik taaguutinillu eqqortunik atuilluni allanneqarsimanersut Oqaasiliortut misissoqqissaaqqaartassagaat CCO-p eqqaaniarpaa.

2. Kingullermik ataatsimiinnermit imaqarniliap akuerineqarnera. Imaqarniliarmi naqqiissutit aaqinneqarput, taamaatsillugulu akuerineqarluni.
3. Saaffiginnissutit
 - a) Minaut/Minaat, ateq pillugu Oqaasiliortunut ingerlateqqitaaq. Oqaasiliortut Inuit Aqqinik Akuersisartut aqqit akuerisaat

ataqqisarpaat, itigartitsissutaasimasunilli Oqaasiliortunut suliaassannortitsissummik tigusaqaraangamik suliaq misissortarpaat, kiisalu aqqup isumaa paasiniartarlugu.

Matumani *minaat* isumaqarpoq upaassissut; sumik arlaanik nerisassamik tigusiissussinermut/toqqorsiissussinermut tunngasoq, ass. nerisassamik sinnikuunngitsumik, kisiannili immikkut pissaqartitsinermik isumaqarluni. Erseqqissaassutaassaaq oqaaseq *minaat* amiakkuunanilu nikassaasuunngimmat, taamaattumik arlaanaatigulluunniit minnerulersitsinani upaassissutaaginnarluni. Tamanna nassuiaat tunngavigalugu Oqaasiliortuni ilaasortat amerlanerussuteqarlutik oqaaseq *minaat* atertut akuerineqassasoq aalajangiuppaat: **Minaut/Minaat**.

b) konfliktmægling aamma mediation kalaallisut:

saqitsaannermi nalerisaaneq – aaqqiagiinnginnermi nalerisaaneq

c) qerinnarfik tassaavoq frysepunkt aamma 0 grader

d) Oqaaseq *kukissaq* pillugu saaffiginnittoq akineqassaaq skifer tassaamat allattarfissiaq imaluunniit qalequtissiaq, matumani sumut atorreqarnera apeqqutaalluni. OQAASERSIUUMmi skiferip allaqqanerani *kukissaq* immikkut qanga sakkuliaasartumut atorreqartoq erseqqissaassutigineqassaaq.

e) eqikkaaneq/naalisaaneq

Naalisaanerit tassaapput oqaatsit naalisakkat, danskisut forkorterlser.

eqikkagaq/eqikkaaneq – resume

imaqarniliaq/imaqarniliorneq - referat

f) køkkenrulle kalaallisut taaguuteqalerpoq **allarutissaq**.

matumani allarterut allarutissiarlu tvistinut atorreqartareertarmata.

g) storskalalov kalaallisut **suliniutit annertuut pillugit inatsit**

h) passiv/aktiv sætninger kalaallisut

kalaallisut oqaaseqatigiit iliorfigisallit iliortortallillu pillugit nassuiaateqareernermi taaguutit ilaatigut atorreqareersut akuersissutigineqarput:

patience **iliorfigisaq**

agens **iliorloq**

i) imod/versus kalaallisoortaanut tunngasoq taaguutillu allat

Suli eqqartuussiveqarfimmi nutserisuunermit vanhjemmel

bistandsbisidderillu taaguutissaanik siunnersuutaat tiguneqanngillat, taamaattoq versus/imod pillugu qisuariaat Oqaasiliortunit tiguneqartoq naapertorlugu Oqaasiliortut isumaqarput oqaaseq *akerleralugu* pineqartillugu pisuutitserortoqartartoq, aamma isumaatigut nutseriinnarnermit pisimassasoq isumaqarlutik. Eqqartuussinerup pilinnginnerani unnerluussisoqarsimatillugu illuatungeriit sassartinneqartarmata *akerleralugu* pinngikkaluarlugu **illuatungeralugu** naleqqunnerusoq Oqaasiliortut isumaqarput.

j) seniorforsker kalaallisut **misissuisuuneq**

k) postdoc kalaallisut oqaasersiatut atuinnassasoq aalajangiunneqarpoq.

l) kannak pillugu EBF-ip allataa tapersiinnarneqassaaq isumaqatiginarluni, tassalu S.L.-ip ordbogiliani kannak nalikkaanut tunngatillugu allassimasaa sukumiisuunanilu immaqa paqumisunnermit taaguutiviinut taarsiullugu atorneqartarmat. Kannak tassaanerugalarpoq umiarsuup tingerlaataannallip(ataani) siuata nuuanut atasoq.

m) Frelsens Hær

Uppernikkut Ikiuiniqatiguit siunnersuutigineqassaaq. Matumani kalaallisut isumaani sakkutuut tassaasarmata saassussisartut imaluunniit illersuillutik nakkutilliisartut. Annannissap akerlianik isumaqarnera pillugu siunnersuut taamaatillugu aalajangiunneqarpoq. Siunnersuut Frelsens Hærimik isumaginnittunut ingerlateqqinneqassaaq, taakkualu aalajangissavaat taaguut akuererusunnerlugu, imaluunniit Frelsens Hær atuinnarniarnerlugu allarlunnarmilluunniit siunnersuutissaqarnerlutik.

4. Allat

Inussiarnersumik inuulluaqqusilluta
Carl Chr. Olsen
Siulittaasoq

Katti Frederiksen
Allatsi